



2025

NALUNAARUSIORNEQ

Suliarineqarpoq:

SULEQATIGIISSITAT

Imarisai

Siunertaq	3
Anguniagaq	3
Suliniuummi sulinermi periuseq akisussaaffinnillu agguataarineq	4
Atortussanik suliaqarneq sulinermilu atortorissaarutit.....	5
Ataatsimut naleqartitanik suliniuummilu ileqquusut pingaaruteqassusiannik suussusersineq	5
Sullitat qulaajarneqarnerat	5
Takorluukkap suliarinera periusissiallu ineriartornera:.....	6
Ataatsimut isiginnittumik periuseqarneq	8
Atuartitsinermi suliniutit perorsaanikkullu periutsinik ineriartortitsineq	8
MA-mi klassit nassuiaatai:.....	11
MA-1:.....	11
MA-2-3-4	11
MA-E	12
Majoriami aqutissiuussinermut suliniutit	12
Najukkami inuiaqatigiinni Majoriaq.....	14
Tasiilami, Paamiuni Qasigiannguanilu atuutilersitsiniarnermik suliaqarneq	16
Malitseqartitsineq aamma siuariartornerup nalilersuiffiginera:	18
Nuuk	18
Qasigiannguut	19
Paamiut.....	23
Tasiilaq	25
Sisimiut	27
Qaqortoq	27
Uummannaq.....	27
Eqikkaaneq:	28
Ingerlatitseqqiineq paasisanillu avitseqatigiinneq	28
Piareersimaneq aamma aaqqissuussaasup ineriartortinnera.....	29
Nukissat inissaqassuserlu	29
Nalilersuineq aamma pitsaassutsimik qulakkeerineq	29
Init avatangiisillu ilikkarnartut.....	30
Atuartitsinermi atortut	30
Innersuussutit:	31
Aningaasarsiorinissamut imminullu pilersornissamut periarfissaqalerneq	31

Suliniutip isumaqassusaa politikkerinillu eqqumaffigineqarnissaanut pisariaqartitsineq	32
Majoriami inunnik isumalluuteqarneq pillugu ajornartorsiummut aaqqiissut	33
Periutsip inummut naleqqussarnera – illuatungaanuunngitsoq	34
Maannakkut suliniutigisanik suussusersineq periutsimillu pitsaaliuinerusumik pisariaqartitsineq	35
Ajornartorsiutit siunnersuutitalinnik ilallit	35

Siunertaq

Suliniutip siuariartornera, inernerī aamma suliniutitut attuumassuteqartut suliniummi pingaarnertut siunertanik eqquutsitseqataasut erseqqissumik takussutissaqalernissaat nalunaaruteqarnermi matumani siunertaavoq.

Suleqatigiissitap ineriartortitsilluni sulinera qulequttanut arfinilinnut suliniummi qitiusumik ukkataqarfinnik imaqartinneqartunut agguataagaavoq: Suliniut tamaat isigalugu – 1 takorluukkap sularinera, periusissiorneq aamma misilittakkanik katersineq. 2 Atuartitsineq – ilikkarnartussatut siunnersuutit perorsaanikkullu periutsit. 3 Aqqutissiuussineq – aqqutissiuussinerup pisariillisarneqarnera nukittorsarneralu. 4. Atuutilersitsineq – suliniummi suliassat illoqarfinnut mikinerusunut najukkanilu pissutsinut naleqqussarneqarneri. 5 Majoriaq tamaat isigalugu – suliffik suliffeqarnerlu, aqqutissiuussineq piginnaangorsarnerlu akimorlugit suliaqarneq ukkataralugu. 6 Majoriaq najugarisami – najugarisami suliaqartut allat suleqatigineqarnerat.

Innuttaasut piginnaasaasa nukittorsarneqarnissaat suliffeqarnermullu attuumassuteqarnerisa annertusarneqarnissaat siunertaralugu, piginnaangorsarneqarnerinut iluaqutaasumik periutsumik suliaqarneq atuutilersitsinissarlu suliniummi siunertaavoq. Ullumikkut sukkasuumik allanngoriartorfiujuartumi eqaatsuunissamillu piumasaqaateqarfiuleraluttuinnartumi kiisalu digitalimik piginnaasaqaqqusaajartuinnartumi, siunnerfilimmik ilikkariartornissamik piginnaangorsarnissamillu qulakkeerinnittumik periutsumik aqqissuussaanagerusumik atoriaannaasumillu pisariaqartitsisoqarpoq.

Periuseq atorlugu najukkani ileqqorineqartut avatangiisinullu tunngasut suussusersineqarlutillu naleqqussarneqartassapput aamma suliffeqarneq inuunerullu sinnerani ilikkariartornissaq pillugit politikikkut anguniakkanut pingaarnertut tapertaassapput.

Anguniagaq

Majoriaq takorluukkap sularineqarnerani qitiusutut inissisimavoq periutsillu pioreersut pisariillisarneqarnissaat, assigiinngitsunik suliaqartut suleqatigiilluarnerulernissaat aamma ilinniarfeqarfiup, inuussutissarsiuteqartut avatangiisillu akornanni attaveqaataasutut inissisimanissaq suliassaralugu.

Innuttaasut ilikkariartornerannut, piginnaangorsarnerannut suliffeqarnermilu peqataanissaannut iluaqutaasumik periutsumik eqaatsumik ataqatigiissumillu suliaqarnissaq siunertaavoq.

Periuseq atorlugu makku neqeroorutigineqarsinnaassapput: Ilikkariartorneq aqutissiuussinerlu ataasiakkaanut sammitinneqarniassammat, ataasiakkaat piginnaasaannik pisariaqartitaannillu qulaajaaneq. Majoriap iluani aamma ilinniarfeqarfinni inuussutissarsiortunilu suleqatigineqartut aqutigalugittaaq piginnaanngorsaanerit attuumassuteqartut takussutissartaat. Ilikkariartornermi suliniutinillu ingerlataqarnerit naleqqussakkat atuagarsornermik suliaqarnermillu ataqatigiilersitsisup najukkamilu pigiliussineramik nukittorsaasup atorneqarnissaat. Tamakkiisumik isiginnittaaseqarnikkut Majoriaq ilinniarfeqarfittut atuinnarneqannginnissaa aammali inuunerup tamaat ilikkagaqarnissamik, inuussutissarsiornikkut ineriartortitsisumik inuiaqatigiillu piujuartitsisumik siuariartornerannik tapertaasumik pilersaarusiukkamik ineriartortitsivittut atuunnissaanik qulakkeerinnittuussaaq.

Suliniummi sulinermi periuseq akisussaaffinnillu agguataarineq

Suliniutip aaqqissuussaanera marlunnik suleqatigiissitaqarpoq – aqutsisooqatigiit aamma suleqatigiissitaq – kiisalu suliniummut aqutsisoq taakkunannga ataqatigiissaarisuusoq.

Ataavartuunissaq, ataqatigiissaarinissaq aamma atortussanik periutsinillu suliaqarnissaq qulakkeerniarlugit suleqatigiissitami qaammammut marloriarlutik kiisalu ukiumut naapillutik pingasoriarlutik ataatsimiittoqartassaaq.

Suliniutip siunnerfia siuariartornissaalu aqutsisooqatigiinnit pingaarnertut akisussaaffigineqarpoq. Isumagisassavai: Suliniutip siuariartornera pingaarnersiuiuertaalu, Aningaasaqarnermik aqutsinertaa missingersuutinillu malitseqartitsinertaa, Suleqatigisanut aningaasaliisartunullu nalunaarusiortarneq, Pingaarnertut ingerlatitseqqiineq paasisanillu avitseqatigiinneq pillugit aalajangiinerit. Taamaattumik Namminersorlutik Oqartussanut kommunimullu ataavartumik malitseqartitsisoqarlunilu suliniutip siuariartorneranut aningaasatigut toqqammaviliisoqarpoq.

Suleqatigiissitami suliatigut ineriartorneq ukkatarineqarlunilu MA-1-imi aamma fagklassini sammisassat sularineqarput. Suleqatigiissitap suliassaraattaaq: Naliliisartoqaatigiit siuariartornermik, misilittakkanik angusanillu malinnaasut. Ingerlatitseqqiisartoqatigiit suliffeqarfimmi ataavartumik ilisimatitsisartuusut saqqummiisartuusullu. Ineriartortitsineramik pikkorissartitsisarnermillu suliaqartut ilinniartitsisut ataatsimoornerinik workshoppinillu pilersaarusiortullu suliaqartut

Atortussanik suliaqarneq sulinermilu atortorissaarutit

Atortussat ineriartortitsinermilu sulinerit tamarmik Trelloimi suliniutip ataatsimut digitalimi atorineqartumi katersuutsinneqassapput.

Matumani peqataasut tamarmiullutik atuartitsinermi atortussanut, sakkussanut aamma allagaatinut isersinnaapput, taamaalillutik paasisat angusallu ammasumik suliniut akimorlugu avitseqatigiissutigineqarsinnaanngorlugit.

Ataatsimut naleqartitanik suliniummilu ileqquusut

pingaaruteqassusiannik suussusersineq

Suliniutaanikuusorpassuarni immikkoortunut assigiinngitsunut illoqarfiup ineriartornissaanut periarfissaqarneranullu pingaaruteqarsinnaasunut ataatsimut takussutissaq amigaataanikuuvoq. Taamaattumik suliniummi matumani ileqqorineqartutut naleqartitat illoqarfimmi inuussutissarsiuteqartut suliffeqarnerullu ineriartortinneqarneranik nammattuusut aallaavigivagut.

Sullitat qulaajarneqarnerat

Sullitanut inuiaqatigiinnullu tunngasut

Majoriami sulinermi sullitat amerlasuutigut mianernartutut inuunermilu ilungersunartutut inissisimasut pineqarput. Peqataatinneqartut arlallit atuarfimmik ajornartorsiuteqarsimasuupput, ilinniakkaminnik taamaatitsiinnartuupput imaluunniit ilinniarfeqarfigisimasaminni ajorsartutut misigisaqartarsimasuullutik.

Arlallittaaq inuunerminni imaannaanngitsumik inooqataanikkut, atornerluinikkut, aningaasaqarnikkut ilaquuttaminniluunniit ajornartorsiuteqarnikkut atugaqartuupput, ilaatigut aalajaatsumik ilinniagaqarnissaannik suliffeqarnissaannilluunniit periarfissaannut sunniuteqartartunik.

Sullitat amerlasuuttaaq nappaataannik suli paasineqanngitsunik imaluunniit nakorsartinneqanngitsunik atugarissaarnerannut, ilikkariartornissaannut ataatsimoortunilu peqataanissaannut annertuumik sunniuteqarsinnaasunik peqarput. Qulaajarneqannginneq aamma meeraanermi inuusuttuunermiluunniit tapersersorneqannginneq paatsoorneqarnermik, imminut

naleqartippiannginermik aamma atuarfimmi inuiaqatigiinniluunniit naatsorsuutigineqartunut naleqqutinnginermik misigisarnermik kinguneqarsinnaavoq.

Ataasiakkaat inuunerminni atugaat Kalaallit Nunaanni inuiaqatigiippassuarni ajornartorsiutaasunut oqaluttuarisaanikkut ileqqorineqartutigullu allannguinerit innuttaasut kinaassusaannut, inuuneranni killiffiannut ataatsimoortunullu attaveqarnerannut sunniuteqarlutik ataqatigiinnerattut isigineqassapputtaaq.

Suliniummi matumani Majoriaq ilinniarfeqarfittuinnaq isiginngilarput, aammali inooqataanikkut inuttullu ineriartorfiusutut isigaarput ilikkariartorneq, aqqutissiuussineq tapersersuinerlu imminut tatiginerup, piginnaasaqalernerup piginnaasallu upperiartornerinut iluaqutaasussaallutik.

Taamaattumik sulineq inuup tamaat isigalugu paasinnittaaseqarnermik aallaaveqartinneqarpoq — ilikkariartorneq paasisanut piginnaasanullu tunngatinneqaannarani, aammali atugarissarnermut, kinaassutsimut, attaveqarnermut ileqqunullu tunngatinneqarlunittaaq.

Takorluukkap suliarinera periusissiallu ineriartornera:

Takorluukkap suliarinera Majoriami atuarfittut aamma inuunerup tamaat ilinniarfiuneranut piginnaanngorsarnermullu ilinniarfittut aallaavigineqarpoq.

Innuttaasut inuiaqatigiinni suliffeqarnikkut, inuttut ineriartornikkut peqataanikkullu periarfissaannik nukittorsaataasussamik ilinniarneq ataavartuusutut isigineqarluni Majoriaq ilinniagaqarnerup, inuussutissarsiuteqarnerup najukkamilu innuttaasuunerup akornanni atassuteqaataavoq.

Suliniut najukkami pissutsinut naleqqussagaalluni Kalaallillu Nunaanni ileqqorisatut naleqartitanik suussusersianik tunngaveqarpoq.

Najukkami ineriartornissamut patajaatsumik, piujuartitsisumik peqataatitsisumillu toqqammavissaqalernissaq matumani kulturikkut kinaassuseq, pinngortitami pisuussutsit piginnaanngorsarnerillu siunissami suliniutinut ilaatinneqarlutik siunertaavoq.

Ineriartorfissatut periarfissat najukkani nukittuffinnut, pisariaqartitanut pisuussutsinullu naapertuuttuutillugit sumiissusersinissaat immikkoortitaarnissaallu siunnerfilimmik anguniarneqassapput.

Tamatuma peqataanik piginnaanngorsarnek politikikkut sulianut najukkanilu aalajangiisartunut ataqatigiisinneqarnissaat pingaartinneqarpoq, taamaalilluni suliniuteqarnikkut piujuartitsisumik siuariartorneq, atugarissaarnek najukkamilu piginnittuuneq tapersearnerlutik.

Ilikkariartornerup paasinninnerullu ineriartortillugit suliarinerini, suliniummi inuk ineriartortussatut – periutsituunngitsoq – aallaavigineqarpoq. Nappaatinik suussusersinerit pikkajuttarput inuit pisariaqartitaat assigiinngissusaallu pinnagit inuiaqatigiit aningaasaqarnikkut soqutiginninneq imaluunniit pissaanerup aaqqissugaanerani paasinnittaaseqarnikkut nalinginnaasunngortinneqaraangat. Nalinginnaasutut isiginnittaaseq aningaasaqarnermik pissaanermillu tunngaveqartillugit, nappaatit suussusaat inuiaqatigiinni pisariaqartitsisutut isiginninnerulersarput – inuk piunnaarlugu.

Taamaattumik suliniut inuit naleqartitaannik inooqataanermut attuumassuteqartunik, ilaqutariittut inuunermik toqqissisimanermut kulturimullu attuumassuteqartunut tunngasunik aallaaveqarpoq. Naleqartitat pineqartut ilikkagassatut anguniakkanut nutaanut kinaassutsimut ataatsimuussutsimullu siunertaqartunut siunnersuummik aallaaveqalersitsipput. Taamaaliornikkut Majoriaq inooqataanermut tunngasut, kulturip ulluinnarnilu inuunerup siunissami annertusarnekarnissaanut tunniusseqataavoq – inuiaqatigiit piujuartitsisut inuppalaartunullu qitiusoq.

Pinngortitaq avatangiisillu pisuussutsit qitiusutut isigineqassapput, aamma suliniut atorlugu inuit, pinngortitap kulturillu akornanni ataqatigiinneq siuarsassavaa.

Najukkami paasisat, kulturikkut naleqartitat siunissamilu immikkoortut ataatsimoortinnerisigut ilikkariartorneq ineriartornerlu avatangiisit qanimut suleqatigalugit inuunermi atukkatigut peqqinnartumik ineriartornissamut piujuartitsinissamullu toqqammaviliissapput.

Ilikkariartorneq, kulturi pinngortitarlu taamaalillutik imminnut qaninnerulersinneqassapput – Majoriarlu taamaalilluni najukkami pigiliussinissamut inuiaqatigiillu ineriartornissaannut ilikkagassatigut qitiusutut peqataassaaq.

Suleqatigiissitap takorluukkap suliarineranut tunniussai

Takorluukkap ineriartortinnerani pigiliunniarneqarneranilu suleqatigiissitaq qitiulluinnartumik inissisimassaaq. Suleqatigiissitamiipput illoqarfinnit arlalinnit aallartitat, taamaammat suliatigut siammasissuseq nunallu immikkoortuinit aallartitaqarneq qulakkeerneqassapput.

Suleqatigiissitap tunniussai: Periutsinik sulinermilu ilutsinik ineriartortitsineq misileraanerlu. Illoqarfinnit suliassa qarfiusunillu assignngitsunit misilittakkanik katersineq avitseqateqarnerlu. Atuartitsinerit aqutissiuussinerillu najukkami pisariaqartitanut toqqammavigisanullu naleqqussarlugit. Workshoppertitsinerit, angalanerit aamma sap. ak. ingerlanerani suliffiit isumassarsiat nutaat periutsillu ineriartortinneqarlutik. Ilikkariartornerup suleqatigiinnerullu ingerlanneqarnerisa pitsaassuseq siuariartortuarnerlu qulakkeerniarlugit nalilersuineq

Suleqatigiissitap misilittagai allagaataalu paasisat avitseqatigiissutiginnissaannut, periutsinik naleqqussaannissaanut siunissamilu Kalaallit Nunaanni illoqarfiit akimorlugit suliniuteqarnissamut pingaarutilimmik toqqammaviliissaput.

Ataatsimut isiginnittumik periuseqarneq

Majoriami takorluukkamik suliaqarneq ataatsimut isiginnittuuvoq aamma ilinniarfeqarfiit, inuussutissarsiutillit, politikkerit najukkamilu innuttaasut akornanni qanimut suleqatiginninnermik tunngaveqartinneqarpoq.

Aaqqissuussaasumik nalilersuinikkut, periutsinik ineriartortitsinikkut suleqatigiinnikkullu suliniutip ataavartumik pitsanngorsarneqarnera qulakkeerneqassaaq. Suliniuteqarnikkut taamaalilluni atuagarsorneq suliaqarnerlu ataqatigiisilersinneqarput tassani najukkami pisuussutsit, kulturi pinngortitarlu ilinniarnermi atorluarneqassallutik.

Atuartitsinermi suliniutit perorsaanikkullu periutsinik ineriartortitsineq

Majoriami atuartitsinerup siunnerfilimmik nukittorsarneqarnissaa ineriartortinneqarnissaalu atuartut pisariaqartitaannut, najukkami pissutsinut suliffeqarnermilu piumasaqaatinut naapertuunnerulerniassammat suliniuteqarnikkut anguniarneqarpoq. Ineriartortitsilluni suliaqarnermi atuartitsinerup, aqutissiuussinerup, pilersaarusiornerup nalilersuinerullu akornanni ataqatigiittoqarnerulernissaa ukkatarineqarpoq, aamma suliniuterpaalunnik sukumiisunik aaqqissuussaasumik suliaqarnermullu tunngassuteqartunik ilinniarnissamut avatangiiseqarnerunissaq anguniarlugu suliaqartoqarpoq.

Atuartut najuunnerisa, siuariartornerisa peqataanerisalu nalunaarsortarnissaannut malitseqartittarnissaannullu pisariinnerusumik ataqatigiinnerusumillu aaqqissuussamik suliaqarneq

qitiulluinnartut ilagisimavaat. Lectiop digitalikkut ataatsimut sakkussatut atuutilersinneqarneratigut atortorissaarut ataatsimut atugassaq atuartitsisunut aqutissiuussisunullu allaffissornikkut suliaannik malinnaalluarnernissaq annikillisaanissarlugu anguniarlugit pilersitsisoqarpoq. Peqataanik Lectio atorlugu ilikkariartornermut atugarissaarnermullu datanik ingerlatsinerunissaq anguneqarpoq.

Tamatuma saniatigut ingerlatsinissamut pilersaarutitalinnik ilinniartitsisunut atuartunullu ilikkagassat erseqqinnerusumik takutitsisuusut ilikkagassatut siunertat erseqqissut naleqqussakkallu suliarineqarput. Periuseq una atorlugu pilersaarusiorneq, siuariartornerup malinnaaffiginera atuartullu ataasiakkaat atuartinneqarnerisa naleqqussarnerat ajornaallisinneqarput. Ukkatarineqartoq alla aamma tassaavoq, atuartut suliatigut, inooqataanikkut aamma inuttut piginnaasaannik ersersitsinissamut allagaatigineqalernissaannullu piginnaasanik qulaajaanissamut aaqqissuussaasumik periutsinik suliaqartoqarpoq. Taamatut periuseqarnikkut nukittuffiit, pisuussutsit aamma ineriartorfiusinnaasut atuartunit ilinniartitsisunillu paasilluarneqarnissaannut iluaqutaassaaq suliffimmullu imaluunniit ilinniagaqaqqinnissamut ikaarsaarnermi sakkussatut atorneqarsinnaalluni.

Ilikkariartaatsit pisariaqartitallu assigiinngitsut eqqarsaatigineqarneruniassammata, Majoriami atuartitsinermi avatangiisit naleqqussarneqarput. Sannaviit assassorlunilu suliaqarnermut tunngasut init pilersinneqarput, taakkulu nutaaliornissamut, assassornissamut kulturimullu tunngassuteqartunik suliaqarnissamut periarfissiipput. Init kajumissuseqarnerulersitsillutillu nuannersumik ilinniarfissiipput Majoriamilu sullinneqartunut eqaatsumik isumassarsiornartumillu ilinniaaseqarnerusumik tapersersuutaallutik. Tamatuma peqataanik Majoriami ilinniartitsisut, aqutissiuussisut klasselærerillu atugassaannik ataatsimut oqaloqatiginneriaatsinik oqaloqatiginninnermilu najoqqutassanik suliaqarnikkut oqaloqatiginneriaaseq nukittorsarneqarpoq. Taamaaliornikkut atuartut assigiissaakkamik isumaqarluartumillu oqaloqatigineqartarneri ineriartornerisalu malinnaaffigilluarneri qulakkeerneqassapput.

Atuartut pillugit ataqatigiissagaanerusumik suliniuteqartarnissaq anguniarlugu, perorsaanikkut ataatsimiittarnerit aalajangersimasut akisussaaffeqarfiillu erseqqinnerusut pilersinneqarput. Matumani atuartitsisup aqutissiuussisullu akornanni suleqatiginnermut nukittorsaataasoq ataatsimut periuseqarluni pilersaarusiorneq, allagaasiorneq atuartullu ingerlatsinerannik nalilersuineq atorneqartarpoq. Atuartut nutaat kikkulluunniit toqqissisimanartumik aaqqissuulluakkamillu aallartinniassammata, ilisarititsinermut aalajangersimasumik

periuseqartarnej atulersinneqarpoq. Tamanna atugarissaarnermut, kajumissutsimut ataatsimoortunilu peqataasutut misiginermut pitsaasumik sunniuteqarsimavoq.

Klassimittaaq aqutsineq ilikkariartornermilu avatangiisit ukkatarineqarput. Init atuartitsiffiusut nuannersumik angerlarsimaffippalaartumillu aaqqissuunneratigut atuartut toqqissisimanerannut, piginnittutut misiginerannut akisussaaqqarnerannullu iluaqutaavoq. Klassimi malittarisassat ataatsimullu naleqartitat erseqqissut ataqqinnilluni peqataatitsillunilu ilikkariartornermut iluaqutaavoq, tassani atuartut atugarissaarlutillu aamma suliatigut inooqataanikkullu ineriartorput.

Ineriartortitsilluni sulinerup ilaa pingaarutilik tassaavoq, oqaloqatigiittarnermut ileqqoqarnissaq atuartitsinermilu allagaateqartarnej. MA-1-imi ilinniartitsisut maanna UV-logbogit atorlugit sulisarpur ataatsimullu ullormut naliliisarlutik tassani misilittakkatik avitseqatigiissutigisarlugit alloriarnerlu tullissaa pilersaarusiorneqarluni. Taamatut periuseqarnej suliatigut siunersiueqatigiinnermik, ataatsimut akisussaaqatigiinnermik ataavartumik pitsanngorsaarnermik siuarsaataavoq. Tamatuma saniatigut atuartut mappii atuartut siuariartornerinik, siunertaannik atugarissaarnerinnillu katersinermut paasissutissatullu allagaqaateqarnermut ataatsimut sakkussatut atornejartarput. Mappit ataavartumik nutarternejartarput aamma ilinniartitsisut, aqutissiuussisut atuartullu akornanni suleqatigiinnermut toqqammaviliillutik.

Ilinniartitsisut aqutissiuussisullu siusissukkut iliuuseqarnissaannut, oqaloqatiginninnissaannut malitseqartitsinissaannullu sukumiisumik sakkussaqaalersillugit aaqqiagiinngitsunik aaqqiiniarnermut ataatsimut periutsumik suliaqartoqarportaaq. Taamatut periuseqarnej toqqissisimanartumik atuartitsinissamut iluaqutaavoq ulluinnarnilu ajornartorsiutaasinnaasunik sulisutut pakkersimaarinninnerusoqarsinnaalluni.

Ataatsimut isigalugu suliniummi sulineq Majoriami ataatsimut isiginnittumik atuartitseriaaseqarnerusumik pilersitsisoqarpoq. Atuartitsineq eqaannerusoq, erseqqinnerusoq sullitanullu naleqqunnerusoq anguneqarpoq, aamma perorsaanerup, aqutissiuussinerup nalilersuinerullu akornanni ataqatigiittoqarnerunera anguneqarpoq. Inernerit tassaalerput ilinniartitsinermit avatangiisit atugarissaarnej, ineriartorneq ilikkariartornerlu qanimut ingerlaqatigiisinneqarlutik aamma atuartut sulisullu pitsaassutsumik, erseqqissuunermik ataatsimullu siunnerfeqarnermik annertunerusumik misigisaqarlutik.

MA-mi klassit nassuiaatai:

Suliniuummi FA-klassit MA-klassinik taaguuteqalernissaat aalajangiunneqarpoq, matumani meeqqat atuarfianni atuartsinerup aamma Majoriami inersimasunut sammitinneqartumik ilinniarnernup akornanni assigiinngissutaa erseqqissuuniassammat.

Taaguutaanik allanngortitsinikkut Majoriaq inersimasunut atuarfiusoq ersersissavaa tassanilu ilinniarneq, aqutissiuunneqarneq ineriartornerlu inersimasup misilittagaanik, pisariaqartitaanik anguniagaanillu aallaaveqarluni – meeqqat atuarfianni aaqqissuussaanerunngitsoq imaluunniit periusaanngitsoq.

Taaguutaasup FA-miit MA-mut allanngortinneqarneratigut Majoriami atuartsineq piginnaangorsarnermut, inuunerup tamaat ilinniarnermut suliffeqarnermullu piareersarnermut sammitinneqartoq ersersinneqassaaq, aamma atuartut inersimasutut ilinniarnerminnut tunngatillugu peqataasassapput.

MA-1:

Klassimi qulaajaaneq atuartut piginnaasaminnik, soqutigisaminnik periarfissaminnillu paasisimasaqarfeqarnerulernissaat siunertaavoq. Sulinikkut misilitsinneq, aqutissiuunneqarneq, suliamik ingerlatsilluni suliniuteqarneq suliffeqarfinnullu assigiinngitsunut naatsumik ilisaritsineq ingerlanneqartarput. Siunnerfissap qulaajarnissaa aamma piginnaangorsaqqinnermut suliffeqarnissamulluunniit kajumilersitsinissaaq anguniagaavoq.

Atuartsissutit neqeroorutaasut: ullut nalinginnaasut, atuarfimmud piareersarnerit, kajumissaarinerit, inuttut ineriartorneq, nutaaliorneq, sannaveqarneq aamma IT

MA-2-3-4.

Klassini ukunani atuartut ilinniarfeqarfinnut nalinginnaasunut, soorlu inuussutissarsiuteqarnermut ilinniarfimmud imaluunniit ilinniarnertuunngorniarfimmud piareersarneqarnissaat ukkatarineqartarput. Matumani atuartsissutit qallunaatut, kalaallisut, tuluttut aamma matematikki aallaavigneqarput, aamma meeqqat atuarfianni inaarutaasumik misilitsinnermut ilikkagassat, kajumissaarinerit atuartullu ataasiakkaat pilersaarusiornissaat suliarineqartarput. Holdit misilitsinnermik naggasiisarput. Atuartsineq atuartsissutit atorlugit ukiumut sap. ak. modulit arfineq-marlunnik ilallugit ingerlanneqartarput

MA-E

Majoriami ungasissumiit atuartitsineq immikkut suliniutitut ingerlanneqarnissaa pitsaanerussasoq nalilerneqarpoq. Atuutilersitsinissaq pitinnagu apeqqutininik aalajangiilluinnartunik qulaajagassaqqarpoq: Ungasissumiit atuartitsineq nuna tamakkerlugu neqeroorutaassava? Sullitat amerlanerpaartaat atuartitsissutininik atuartinneqarneq pinnagu allanik pisariaqartitsippat? Atortussat digitalikkullu sakkussat suut suliarineqarlutillu atorneqassappat? Naammattunik sulisoqarnissaq piginnaanngorsaanissarluk qanoq qulakkeerneqassappat? Suliniut aningaasatigut qanoq ittunik killiliussaqqartinneqassava?

Atuartitsisartut eqqarsaatigalugit inunnik isumalluuteqarneq maannakkut annertuvoq tamannalu ajornartorsiortitsisarpoq, tassami Majoriani sulisut akornanni piginnaasaat assigiinngiiaangaatsiarput. Taamaattumik innersuussutigineqarpoq ungasissumiit atuartitsinermut suliniutissatut siunnersuutissaq ukiunut marlunnut ineriartortitassatut suliarineqassasoq, ilaatigut aaqqissuussaannermut, siunertanut, piginnaanngorsaanermut aningaasaqarnermullu pilersaarutit erseqqissut suliarineqassallutik.

Digitalikkut ilinniartitsinermi sakkussat ulluinnarni atuartitsinerup nalinginnaasumik ilagissavaa, aamma naak ungasissumiit atuartitsineq immikkut ingerlanneqqartartunngoraluarpat.

Majoriami aqqutissiuussinermut suliniutit

Atuurtut atuarnarat aaqqissuussaasumik, pitsaassusilimmik ataqtigiiissumillu ingerlannissaanut ukkatarinnilluni siunnerfilimmik suliarinissaa Majoriami aqqutissiuussilluni suliaqarnermi aallutarineqarpoq – atualeqqaarnermiit inaarnissaa tikillugu. Aqqutissiuussineq ilinniarnarup ilaattut nukittorsarneqarnissaa aamma innuttaasut ataasiakkaatut anguniagaasa Majoriallu ataatsimut piginnaanngorsaanermut suliniutaata taperserneqarnissaa qulakkeerniarlugu siunertaavoq.

Innersuussisarnarup ingerlanneqqartarnera ersarissuussasoq aaqqissuussaasuussasorlu ineriartortitsinermi qitiulluinnartut ilagaat. Innuttaasut ilinniarfeqqarfinnut suliffissaqqartitsiniutinullu qanoq innersuunneqqartassasut ataatsimut malittarisassanik amigaateqqartoqqarnikuuvoq aamma anguniakkat eqqarsaatigalugit piginnaasaasa qanoq nalilernissaat ilanngullugit. Taamaattumik innuttaasup kissaatai, misilittagai aamma pisariaqartitai qitiutillugit assigiissaakkamik paasiuminartumillu ingerlatsinissamut toqqammaviliisumik innersuussisarnissamut immersugassaq suliarineqarpoq. Taamatut periuseqarneq suliniummi pitsaassuseq aamma innuttaasup Majoriap sulineranut tatiginninnera nukittorsaavigineqarput.

Tamatuma saniatigut qinnuteqarnermi immersuiffissamik nutaamik Majoriami MA-p aaqqissugaaneranut ingerlatsinissamullu periarfissanut assigiinngitsunut naleqqussagaq suliarineqarpoq. Immersuiffissaq atorlugu ataasiakkaat tunuliaqutaat kajumissusaallu takujuminarnerulerput ataasiakkaanullu aqutissiuussineq naleqqussarneqarsinnaasoq qulakkeerneqarluni.

Atualernissamut akuerineqarnerup nalaani eqaannerusumik periuseqarnissaq anguniarlugu, atualersussanik akuersisarneq ukiumut pingasoriarlugu ingerlanneqartalerpoq - aggustimi, oktobarimi aamma januaarimi. Taamatut allannguineri innuttaasut piffissani assigiinngitsuni aallartikkusuttut akuerisarnissaat periarfissaalerpoq, aamma ilikkariartornissamut ammanerusumik peqataatitsinerusumillu periuseqarneq periarfissaanerulerluni.

Atuartitsisuttaaq aqutissiuussisullu akornanni suleqatigiinnerisa pingaarutillit ilaat perorsaanermut tunngatillugu ataatsimiittarnerit aaqqissuusaanissaat erseqqinnerulersinnissaallu suliarineqarput. Nutaamik ataatsimeeriaaseqalernikkut ataatsimiittarnerit erseqqissunik oqaluuserisassaqtillugit, erseqqissunik siunertaqtillugit aalajangersimasunillu naliliinernik suliaqarfiutillugit qulakkeerneqarput. Matumani attaveqaqatigiinneq pitsaanerulerpoq aamma atuartut pillugit sulinerup pitsaannerusumik ataqatigiisneqarnerulernerat qulakkeerneqarpoq.

Ukkataqarfiusoq alla tassaavoq suliffimmik sungiusarnermut atatillugu suliffeqarfinnik suleqateqarneq. Suliffimmik sungiusarnissamut isumaqatigiissutini allanngujaatsunik naleqquttunillu pilersitsiniartarneq siornatigut ajornartorsiutaasarnikuuvoq. Taamaattumik suliffeqarfiit ataasiakkaat pisariaqartitaannut atuartullu piginnaasaannut naleqqussakkanik suliffimmik sungiusarnermut atortussat nalinginnaasunngortitat isumaqatigiissuteqarnissamullu immersuiffissat suliarineqarput. Tamatuma suleqatigiinneq pisariillisippaa taavalu ingerlatsinerit ataasiakkaat aaqqissuusaasumik malitseqartinnissaannut naliliiffisarnissaannullu periarfissaqartilerlugu. Suleqatigiinnermi café ("inuiaqatigiinni Majoriap" ataani suleqatigiinniarluni caféqatigiittarneq) naapiffittut atorneqartarpoq, tassanilu isumassarsiat iliuusinngortinneqartarlutik, aamma ilinniarfeqarfiup inuussutissarsiuteqartullu akornanni suleqatigiinneq nutaaq pilersinneqartarluni. Sapaatip akunneranut marloriarluni ullormi ataatsimi akunnerit arfinillit atorlugit aalajangersimasumik sulineri sungiusarnissamut isumaqatigiissusiortoqarnissaa Majoriami nalinginnaasumik atuartitsineri atuartullu ataasiakkaat pisariaqartitaannut naleqqussakkanik pilersitsisoqarnissaa sulissutigineqarsinnaavoq. Taamatut naapittarnerit Majoriamik ersarinnerulersitsillutillu suleqatitut angujuminarnerulersitsipput, aamma

najukkami ilinniarfeqarfittut suliffeqarfittullu periarfissat innuttaasunit paasisimasaqarfiginerulernissaannut periarfissiipput.

Najukkami inuiaqatigiinni Majoriaq

Najukkami inuiaqatigiinnik suleqateqarnerulernissaq aamma ilinniarfeqarfiit, inuussutissarsiuteqartut ataatsimoortullu akornanni qaninnerulernissaq anguniarlugit Majoriami ineriartortitsinermut suliat pingaarutillit ilagaat.

Tamannalu pisarpoq Suleqatigiinnissamut caféqatigiinnikkut – paasisanik, misilittakkanik isumassarsianillu avitseqatigiinniarluni suliffeqarfiit, atuarfiit, peqatigiiffiit, kulturimik suliaqartut innuttaasullu Majoriamik naapitsillutik oqallittarfiat. Suliniutit ataatsimoorussat ilinniagaqalernissamut, suliffimmik sungiusarnissamut piginnaanngorsarnissamullu periarfissiissut ineriartortissallugit aamma najukkami inuiaqatigiinni pisariaqartitsinermik aallaaveqartut siunertaapput.

Suleqatigiinnissamut caféqatigiinneq naapittarfiuvoq isumassarsianik iliuusinnngortitsiviususaaq aamma ilinniarfeqarfiit inuussutissarsiuteqartullu akornanni nutaamik suleqatiginnilernermik pilersitsiviusartut.

Taamatut naapittarnerit Majoriamik ersarinnerulersitsillutillu suleqatitut angujuminarnerulersitsipput, aamma najukkami ilinniarfeqarfittut suliffeqarfittullu periarfissat innuttaasunit paasisimasaqarfiginerulernissaannut periarfissiipput.

Suliffimmik sungiusarnerup aaqqissuussaasumik malitseqartinneqarnera nalilersuiffigineralu misilittakkanik uppersaateqalersitsisarlungu suleqatigiinnerup ataavartumik pitsanngorsarnissaanut periarfissiivoq.

Ilinniartitaaneq suliffeqarnerlu isumaqarluartumik ataqatigiilersillugit Majoriap najukkamilu inuussutissarsiuteqartut akornanni atajuartussamik tutsuiginninnermillu tunngaveqartumik suleqateqarnerunissaq anguniagaavoq.

Suleqatigiinnissamut caféqatigiittarneq suliffeqarfinillu nukittorsakkamik isumaqatigiissuteqarnerit ataatsimoortillugit Majoriaq pillugu assigiinngiiaartumik ineriartorfiusumillu avatangiiseqalernissamik pilersitsipput — najukkami pisuussutsit, paasisat

ataatsimoortullu ilikkagaqarnissamut, atugarissaarnissamut siunissamilu suliffissanik periarfissaqarnissamut avatangiisit ingerlatsisuussallutik.

Tamatuma saniatigut misilitsinnermut immersugassaliortoqarpoq atuartut piginnaasaannik, allattariarsornermik oqaluttariarsornermillu misilitsinnissaannut ilinniartitsisut pilersaarusiornissaannut piareersarnissaannullu ikiuutaasussanik. Piffissaliussinerit pilersaarusiornermilu sakkussat erseqqissut misilitsinnerit nalaanni malinnaalluarnrunissamut aaqqissuussaarnrunissamullu iluaqutaapput.

Atuartitsinerup, pilersaarusiornepup aqputissiuussinerullu akornanni ataqtigiilersitsisoqarnrunissaa anguniarlugu, ilinniartitsisup atuartullu akornanni suleqtigiinnikkut modulinut ilanngunnissamik pilersaarusiornissamillu qulakkeerinnittussanik sap. ak. modulikkaarinermut immersuiffinnik atuutilersitsisoqarportaaq. Taamaalilluni atuartitsineq atuartup pisariaqartitaanut kissaataanullu naleqqussaannissaq aamma ilinniarnermi eqaannerusumik ingerlariuseqarnissaq periarfissaalerpoq.

Naggataatigullu aqputissiuussilluni sulinermi gruppikkaarluni aqputissiuussineq atuartut ataatsimut aporfeqarneri pillugit tapersersuinermik siunertaqartoq pingaarutilittut ilaatinneqarpoq. Atuartorpaaloqarpoq inuttut inooqataanikkulluunniit ajornartorsiutinik misigisaqarsimasunik ilinniarnermi nalaani sunniuteqarsinnaasunik. Gruppikkaarluni aqputissiuussineq taamaattumik toqqissisimanartumik kajumissuserlu aallaavigalugu peqataaffigisassatut atorneqartarpoq, tassanilu atuartut misilittakkatik oqaluttuarisinnaavaat, tapersersorneqarsinnaapput ataatsimoorlutillu sammisanik suliaqarsinnaallutik.

Aqputissiuussilluni suliaqarneq ataatsimut isigalugu Majoriami ataatsimoortumik inunnillu qitiutitsisumik isiginnittaaseqarluni ingerlariutsimut tunniussaqrpoq. Ingerlatat paasiuminarnepup, eqaannepup atuartullu inuunerannut piviusunut naleqqussarneqarnullutik. Aqputissiuussineq allaffissornermik sulinertut isigineqarunnaarpoq, innuttaasulli ataasiakkaat anguniagaat, atugarissaarnepup periarfissaallu qitiutillugit ilinniarnepup ineriartornerullu ingerlanneqarnepup ilaatinneqarluni.

Tasiilami, Paamiuni Qasigiannguanilu atuutilersitsiniarnermik suliaqarneq

Majoriami atuartitsiviit akimorlugit suliniutip pisariitsumik ataqatigiissakkamillu atuutilersinneqarnissaa qulakkeerniarlugu, aaqqissuussat erseqqissut, malittarisassat akisussaaffiillu agguataarneqarneri aaqqissuussaasumik suliarineqarput. Atuutilersitsinerimi immikkoortut suliasat, aaqqissuussaanerit perorsaanerimullu tunngasut suliniutinik nutaanik pigiliussinissamik illoqarfinnilu tamani allanngujaatsumik ingerlassinnaaneriniq qulakkeerinnittussat pineqarput.

Atuutilersitsinerimut ataatsimut atugassat sukumiisumik aqutissiuussinernik, eqqaamasassatut allattukkanik aamma illoqarfimmi nutaami aallartinnermut atatillugu sulisut suliasaannik imallit suliarineqarneri matumani pingaaruteqartut ilagaat. Ataatsimut atugassat assigiissaarinermik, pitsaassutsimik qaffasissumik aamma suliniutinik sammisassanillu nutaanik pisariitsumik suliaqarnissamik qulakkeerinneqataasussaapput.

Tamatuma saniatigut atuutilersitsinerup ingerlannerani sulisut tamarmik erseqqissunik atuuffeqarnissaannik akisussaaffeqarnerinillu qulakkeerinnittumik suliasanik agguataarisogarpoq. Akisussaaffeqarfiit paasiuminartuullutillu ataqatigiissagaaniassammata immikkoortortaqarfiit ataasiakkaat sulisullu suliasaannik takussutissartai suleqatigiissitami suliarineqarput.

Atuutilersitsinerimi oqilisaassiniarluni angusat periutsillu ingerlateqqinneqartarnissaat saqqummiunneqartarnissaallu pingaartinneqarsimapput. Suleqatigiissitaq suliasaqarfinnut pingasunut agguataagaavoq, tassaniippullu MA-1, Lectio aamma fagklassit, gruppillu tamarmik immikkut saqqummiussinissaminut suliasaqarfimmilu iluani misilittakkami avitseqatigiissutiginnissannut akisussaaffeqartinneqarput. Taamaaliornikkut paasisat nutaat illoqarfinnut allanut sulisunullu sukkasuumik ingerlateqqinneqarnissaat qulakkeerneqassaaq, taamaalillunilu periutsinik suleriaatsinnillu atorineqartunik ataatsimut paasinninneq anguneqarluni.

Nalilersuineq atuutilersitsinerup nalaani pingaaruteqarluinnartumik inissisimavoq. Pitsaassutsimut annertussutimullu tunngasunik nalileeriaatsinik atuisogarpoq, matumani apersuilluni immersuiffiit, apersuinerit aamma atuartunit, atuartitsisunit aqutsisunillu paasissutissanik katersineq ilanngullugu. Nalilersuinerit suliniutinik sulinerimi qanoq atorineqartartut pillugit pingaarutilimmik paasisaqarfigineqarput aamma naleqqussaanissamut ineriartortitseqqinnissamullu toqqammaviliillutik.

Illoqarfinni mikinerusuni naleqqussaaneq atuutilersitsinermi pingaarutillit ilagaat. Pisuussutsit, suliatigut piginnaasat najukkanilu pissutsit illoqarfimmiit illoqarfimmut assigiinnginnerat annertuvoq, aamma periutsit suliniutillu najukkani isumaqarluartumik atorneqarnissaat qulakkeerniarlugit naleqqussarneqarnissaat pisariaqarsimalluni. Najukkani nukittuffiit piginnaasallu atorluarneqarnerisigut kajumissuseqarneruneq aamma atuutilersitsinermi pitsaassuseqarneruneq qulakkeerneqarput.

Illutaanni init pingaaruteqarluinnartumittaaq inissisimapput. Majoriami atuarfiit tamarmik assigiinngitsunik atortorissaarutaateqarput, aamma iluisa aaqqissugaaneri atortuutaalu atuartitsinermut sammisassaqtitsinermullu isumannaatsumik, pisariitsumik isumassarsiorfiusumillu ingerlanneqarniassammata siunnerfilimmik pitsanngorsaaneq ingerlanneqarpoq. Matumani atortussatut pisariaqartitanik, pisiniarnermik atortuutinillu agguataarinernik pilersaarusiorneq pineqarportaaq, ilaatigut atuarfinni tamani sammisassat ingerlannissaannut nukissat pisariallit pigineqarnissaat qulakkeerniarlugu.

Tamatuma saniatigut atortussanik inniminniisarnermut najoqqutassanik nalinginnaasunik suliaqartoqarpoq, taamaalilluni atortuutit pequtillu piffissaq eqqorlugu aggiunneqartarniassammata immikkoortortaqaafiillu ataasiakkaat kinguaattoornertaqaanngitsumik ingerlatsinissartik pilersaarusiorniassammassuk. Peqataanik najoqqutassanik naleqqussaaneq ukkatarineqarpoq, ilaatigut atuartitsinermi ilutsit periutsillu naleqqussarneqarneritigut najukkani pisariaqartitanut nukissanullu naapertuuttunngorlugit piniassammata.

Kiisalu illoqarfinni najukkani piginnaasat suussusersinissaat atulernissaallu anguniarneqarputtaa. Sulisunik, suleqatigisanik najukkamilu inuiaqatigiit akornanni nukissanik peqataatitsinikkut piginnittuuneq, peqataaneq aamma atuutilersitsinermi attuumassuteqartut annertusarneqassapput.

Periuseq ataatsimut isigalugu Majoriami suliniutinik nutaanik aaqqissuussaasumik, najukkanut naleqqussakkanik pisariitsumillu atuutilersitsisoqarnissaanik qulakkeerinnittuupput. Pilersaarusiornermi, akisussaaffeqarnermi, ingerlatitseqqiisarnermi nalilersuisarnermilu aaqqissuussat patajaatsumik ingerlatsinissamut tapertaallunilu Majoriani tamani akimortumik sulinermi pitsaassutsimik siuarsaatitsivoq.

Malitseqartitsineq aamma siuariartornerup nalilersuiffiginera:

Nuuk

Nuummi Majoriaq suliniummi qitiusumik inissisimavoq aamma MA-mi atortussanik periutsinillu suliaqarnermi, misileraanermi nalilersuinermilu pingaarutilimmik atuuffeqarluni.

Nuummi atuarfigineqartoq siammasissumik katitikkamillu atuartunik toqqammaveqarpoq, tassani atuartut arlallit sineriammeersuullutik aamma atuartut amerlasuut assigiinngitsunik nappaateqartut inooqataanikkullu imaannaanngitsunik unammilligassaqartut sullinneqarlutik.

Tamanna annertunerusumik assigiinngisitaarnerusumillu nalilersuinissamut MA-mik periutsip ineriartorteqqinnissaanut nalilinnik paasisanik pissarsiffiusumik periarfissiivoq.

Atuartitsineq sullitanut assigiinngitsorpassuarnik pisariaqartitsisunut naleqqussarneqassammat sulisunut, inissaqassutsimut nukissanullu annertunerusunik piumasaqaatitaqalerportaaq.

Nuummi Majoriaq taamaalilluni ineriartortitsiffiusutut aamma atuartitsinermi atortussanik nutaanik, aqqutissiueriaatsimik aamma aqqissuussaannikkut aqqiissutininik illoqarfinnut allanut ingerlateqqikkumaakkanik misileraaviusutut atuuppoq.

MA-1-imi atuartut: nalilersuineq

MA-1-imi atuartut ingerlatsinertik inuunermik uppernarsaasutut isumaqarluartutullu oqaatigaat.

Utertitseqqinnermi sammisap misissuataarnera naapertorlugu sulinermi assassornikkut piginnaasaasa takutinnissat inerisarnissaallu periarfissaavoq - imminut tatiginerulernertut tulluusimaarnertullu arlalinnit misigineqartoq.

Atuartut arlallit oqaatigaat MA-1-imi peqataanerminni namminiussusertik

inissaqartinneqarsimasoq: "Tamatta immikkut oqaluttuassartaqarpugut taakkulu maani tusarnaarneqartarput." Assigiinngissutsimik inissaqartitsineq ataasiakkaat iluatsittutut namminneq isiginninnissaannut periarfissiivoq – suliatigut ineriartorneq, atugarissaarneq inuttulluunniit siuariartorneq pineqarneri apeqqutaatinnaq.

MA-1-imiinneq ataqatigiinnermik ataatsimuussusermillu misigititsivoq tassani imminnut tapersersortarlutillu pisumi maannami atukkatik atugarisarlugit. Sammisassat pinngortitamiinnerit kulturikkullu misigisassat immikkut nuannaarutigineqarsimapput ulluinnarnilu oqaloqatigiinnissamut nukissanillu pissarsiffiusutut isigineqarlutik.

Naggataatigullu arlalinnit oqaatigineqarpoq avatangiisit angerlarsimaffippalaartut toqqissisimanartullu atuarnerninnut pingaaruteqarlunnartuusimasut. Eqqissisimanartuutitsipput ilikkagaqarnissamullu kajumilersitsillutik – alloriarnissamullu sapiissuseqalersitsillutik.

24/25 MA1-imi ingerlataqarneq

Naammassinnittut ilinnialersullu arnat arfinillit

Naammassinnittut sulilersullu angut ataaseq arnallu marluk

Naammassinnittut aallartinngitsut angutit marluk arnarlu ataaseq

Taamaatitsiinnartut arnat marluk angullu ataaseq

Naammassinnittoq DK-mullu aallartoq angut ataaseq

Naammassinnittoq Pilersitsivimmiittorlu angut ataaseq

MA-1-imi imaluunniit ataatsimoortitsillutik sulii ingerlatsisut arnat arfinillit angutillu qulit

Fagklassini nangitsisut sisamat

Majoriami massakkorpiaq ingerlatsisut inuit 65-iupput

Tamatuma saniatigut sap. ak. ataasiarluni suliffissarsiornermut qulaajaaneq ingerlanneqartarpoq.

Ingerlatsinermi matumani peqataasunut 12-inut inissaqarpoq.

FA-mik soraarummeerutaasumik misilitsittut 2023-mi atuartut amerlassusaat ukiukkut 13-it

FA-mik soraarummeerutaasumik misilitsittut atuartut amerlassusaat - aasakkut ukiukkullu inuit 48-t (atuartut allattorsimaffianni naatsorsuinermit)

FA-mik soraarummeerutaasumik misilitsittut 2025-mi atuartut amerlassusaat - aasakkut 45-t

Qasigiannguut

Ingerlataqarnerup oqaluttuassartaa

2024-mi februaarip qaammataani Qasigiannguani MA-mik atuutilersitsinissap ilaattut Lectio ilisaritinneqarpoq. Immikkoortumi aallarnisarfiusumi atortorissaarut atuartitsisunit atuartunillu misilerarneqarpoq, tamannalu atuartitsinermi atuinissamut periarfissat naleqarluartumik paasisimasaqarfigineqarput. Atuarfimmi aqutsisumut sulisunullu ineriartorneq suliniutaasussallu pillugit ataavartumik ilisimatitsissutigineqartarput.

2025-mi maajip qaammataani suleqatigiissitaq atuutilersitsinermi ataatsimut atugassap piareersarnissaanut MA-llu 2025-mi aggustip qaammataani aallartinnissaanut illutaani ininik naleqqussaaniissamut Qasigiannguanukarput. Atuuffiit, eqaassuseq aamma atuagarsorneq suliaqarlunilu ilinniarneq iluaqusersorneritigut ukkataralugit init aaqqissuunneqarput.

MA-p aallartisarnera

2025-mi aggustimi aallartisarnermi MA-1-imi atuartoq ataaseq MA-milu atuagarsortut atuartut sisamat aallartittussatut akuerineqarput. 2025-mi oktobarimi atuartut MA-1-imi ataatsimiit tallimanut aamma MA-mi atuagarsortut tallimanut amerlipput.

Atuartut atuagarsortut qaammammut sapaatip akunneranik ataatsimik atuagarsunngitsunik naapisimaagaqartarput taamaammat inooqatigiinnissamut suliatigullu avitseqatigiinnissamut tamanna periarfissiisarpoq. Taamatut aaqqissuussineq nikerarnermik, suliassat akimorlugit suleqatigiinnerup nukittorsarneranik atuartunullu assigiinngitsunik ilikkariaatsinik misilittakkanik kinguneqartarpoq.

Atuutilersitsinissaq sioqqullugu

Suleqatigiissitap tamatigut naapinnerata kingorna sulisunut saqqummiisoqarlunilu paasissutissiisoqartarpoq, tassani suliniutaasussat aamma MA-mi atuutilersitsiffiusumut naatsorsuutigisassat eqqartorneqartarlutik.

MA-mi atuartitsissutit nutaat erseqqissunik ilikkagassatut siunertallit aqquutissiuussinermilu atortussallit sulisunit tigulluarneqarput. Aqquutissiuussinermut immersuiffissat suleqatigiissitamit suliarineqartut atorneqartarput aamma Lectio atuartut, ilinniartitsisut aqquutissiuussisullu akornanni attaveqatigiittarfittut atorneqartarpoq.

Atuartitsineq sulisut piginnaasaannut naleqqussarneqartarpoq taamaalillutik nukittuffitik malillugit atuartitsisarlutik. Qasigiannguani ilinniartitsisunit marluusunit atuagarsornermik atuartitsineq aamma MA-1-imi atuartitsinerup ilaa isumagineqartarput. Aqquutissiuussisut marluk nutaaliornermik atuartitsineq aqquutissiuussinermullu attuumassuteqartumik sammisaqartitsineq atuartut inuttut atuagarsornikkullu ineriartornerinut iluaqutaasoq isumagisarpaat.

Atuartut aaqqissuussami nutaami naleqqussallaqqinnertik kajumissuseqarnertillu takutippaat. Avitseqatigiiffiusumik atuartitseriaaseq atuagarsortut atuagarsortuunngitsullu naapittarfiat peqataatitsisumik ilikkariarnermik pilersitsivoq.

Assassorluni suliassat, pinngortitamut tunngasunik sammisassat aamma nutaaliornermik suliniutit kajumissutsimut atugarissaarnermullu iluaqutaasut suliarisarpaat.

Atuartut suleqatigiinnermik piginnaasaanni, inooqataanikkut piginnaasaanni namminnerlu piginnaasaminnik upperinninneranni erseqqissumik ineriartorneq takuneqarsinnaavoq. Atuartut arlallit oqaatigaat malugineqarlutillu tusaaneqartutut misigisartut, aamma atuartitsineq ataasiakkaatut pisariaqartitaat soqutigisaallu aallaaviginerullugit ingerlanneqartartoq

MA-mik atuutilersitsineq atuartitsinermi avatangiisinut perorsaanikkullu isiginneriaatsimut annertuumik sunniuteqarsimavoq.

Atuartitsinermi eqaannerulersitsisoqarpoq, aamma ilinniartitsisut atuartunut ataasiakkaanut imarisanik periutsinillu naleqqussaanaissaannut periarfissagissaarnerulerput.

Atuartitsisut aqqutissiuussisullu akornanni suleqatigiinneq nukittorsarneqarpoq suliatigullu nutaanik ataatsimoorfeqartoqalerluni.

Atuartunik nalilersuineq

Atuartut ilinniarnermi ingerlanerat sunniuteqarfiginerulerlugulu pilersaarusiornermi nalilersuinermilu eqinnaatsumik peqataatinneqartalerput.

MA-mi atuartitsissutit nutaat atuartunut atuartitsisunullu piumasaqaatitaqalersitsipput. Atuartitsissutit assassornermut tunngassuteqartuupput, akimorlugu ingerlataapput aamma eqinnaatsumik peqataanissamik, oqaloqatigiittarnissamik suleqatigiittarnissamillu piumasaqaatitaqarlutik.

Atuartut atuagarsornermiit suliaqarnermut ingerlatsisinnaalertariaqarput taamaammat suliatigut alaatsinaanneruneq kajumissuseqarnerunerlu malunnarpoq.

Erseqqissunik najoqqutassiinissaq ilikkagassatullu siunertaqarnissaq kiisalu najukkami pissutsinut atuartullu tunngavigalugit atuartitsinermit atortussanik naleqqussaanissaq siunnerfilimmik atuartitsisunit suliaqartoqarpoq.

Atuutilersitsinertaaq aaqqissuussaanikkut unammillernartitanik qulaajaaffiuvoq. Skiimat, nukissat aamma atuartitsissutit atuuffiillu akimorlugit suleqatigiinnerit ataqatigiissakkat suliarineqarput.

Aqqutissiuussineq, atuartitsineq aamma allagaqaateqartarneq eqqarsaatigalugit atuuffinnik agguataarineq akisussaaffillu ersarissut pisariaqartinneqarneri erseqqinnerulerput, aamma Lectio maanna pilersaarusiornermut malitseqartitsinermullu sakkussatut qitiusutut atorneqartarpoq

Atuartunik apersuineq

Atuartunik pitsaasumik apersuinerit naapertorlugu MA-p isumaqassusaa isumaqatigiiffiulluarpoq. Atuartunit pingaartumik oqaatigineqarpoq: Ilinniarnermut assessorluni periuseqarneq. Pinngortitami najukkami suliniutinik suliaqarnissamut periarfissaqarneq. Ilinniartitsisunut aqqutissiuussisunullu attaveqarluarsinnaaneq. Kajumissuseqarneruneq atugarissaarnerlu

MA-mik ingerlatsineq toqqissisimanartuusoq, aaqqissuussaasuusoq kajumissuseqarnartuusorlu oqariartuuteqartunit ataatsimut takutinneqarpoq.

Arlallit oqaatigaat MA nutaamik aallartiffittut isigigitsik – tapersersorneqarlutik, siunnerfeqarlutik aamma inuttut, suliatigut inooqataanikkullu ineriartornissamut periarfissaqarlutik sumiiffeqarlutik.

Nutaaliornermik atuartitsissutit pinngortitalerillunilu sammisassaqaartitsinerit immikkut sunniuteqarluartutut oqaatigineqarput, aamma atuartut misigisaat naapertorlugu suliniutini aalajangersimasuni piginnaasatik atorsinnaasarlugit, soorlu nioqqutissiornermi, pinnersaasiornermi najukkamilu aaqqissuussani.

Atuartorpaaluittaaq oqaatigaat MA-mik ingerlatsineq inooqataanikkut ajornartorsiutigisami, annilaangasarnermi imminullu nalikitsutut isiginermi pakkersimaarnissaannut qanoq iluaqutaasimatigisoq. Arlallit imminnut tatiginerulerlutik, innartarfik makittarfillu aalajaannerulerlutik takkuttartullu amerlinerullutik.

Ilinniaqqinnissamut, imminnut pilersornissamut imaluunniit najukkami inuiaqatigiinni ullup ilaannaani sulinissamut ilaannut kajumilersitsisimavoq.

Inerniliussaq

Qasigiannguani MA-mik atuutilersitsineq iluatsilluarpoq isumaqarluarlunilu, atuartitsinermi avatangiisinik atuartullu inuttut ineriartornerinik nukittorsaataalluni.

Eqaatsumik aaqqissuussaq atuagarsornermik assassornermillu atuartitsinerinik aamma pinngortitamiittarnermik najukkamilu inuiaqatigiinnik akuleriisitaq peqataatitsisumik kajumilersitsisumillu ilinniarfimmik pilersitsiviuvog.

Atuartut atugarissaarnerulerput, kajumilernerulerput sunniuteqaqataanerulerlutillu aamma arlallit oqarnerat malillugu MA pissutaalluni ingerlatitsiinnarusullutillu siunissamut neriuuteqalersitsivoq.

Atuartsitsut aqutissiuussisullu atuartitsinerinik najukkami pissutsinut naleqqussaapput aamma sulianik ilisimasaqatigiiaat suleqatigiinnerat nukittornerulerpoq.

Tamatuma peqataanik atuuffiit agguataarneqarnerat, ataqatigiissarineq aaqqissuussaanerullu ineriartortinneqarnera suli ukkatarineqarnissaannut pisariaqartitsinerit atuutilersitsinikkut qulaajarneqarput.

Atuartut pitsaassutsimut tunngatillugu oqariartuutaat naapertorlugit MA suliatigut, inuttut inooqataanikkullu ineriartornissamut periarfissagissaarpoq aamma neqeroorutitut imminut pilersornerulernissamut, atugarissaarnerulernissamut inuiaqatigiinnilu peqataanerunissamut iluaqutaasinnaalluni.

Qasigiannguani MA siunissami atuutilersitsisarnissanut siuttuuffittut isigineqarpoq – siunnerfilimmik perorsaanikkut aaqqissuussatigullu ineriartortitsineq qanoq pitsaasunik atajuartussanillu atuartunut najukkamilu inuiaqatigiinnut allannguisinnaasut pillugit assersuutitsialak.

Paamiut

Paamiuni MA1-imik ingerlatsinissap aallartisarneqarnera 2024-mi februaarip qaammataani aallartinneqarpoq, tassani pilersitsinissamut pilersaarusiornissamullu isumassarsiorniarluni Tasiilamut piareersarnek siunertaralugu angalasoqarluni. Angalanissaq sioqqullugu Paamiuni init assiliortorneqarput. Assit titartakkallu atorlugit atuartitsinermi avatangiisit takorlooruminarsarnissaannut naleqqussarnissaannullu toqqammaviliisoqarpoq. Atortussat

inniminnerneqarput qaammataluillu qaangiummata tikillutik kingornalu init atortuutillu piareersarneqarlutik.

Angerlamut apuunnerup kingorna piareersaatit sukumiisumik suliarineqalerput. Suliatiqut pilersaarutit atuartitsinermilu atortussat suleqatigiit qanimut suleqatigalugit suliarineqarput. Atuartitseriaaseq nutaaq illoqarfimmi soqutigineqangaatsiarluni tigulluarneqarpoq. Atuartut atuartitsisullu piumassuseqarnerminnik takutitsipput aamma ingerlatassaq ajornartorsiorfiungaangitsumik pilersinneqarpoq.

Aallartisarfimmi atuartitsisut akornanni ilikkagassatut siunertat suli naammassineqanngimmata nalornisoqarpoq. Kingunerisaanik atortussat namminneq suliarisariaqarnerinik suleqatigiinnillu qanimut suleqateqarnissamik piumasaqaatitaqarluni. Ingerlatassaq marlunnik faglærereqarluni aallartinneqarpoq kingorna faglærerit pingasunngorput oqaatsinullu ilinniartitsisoq ataaseq aallartilluni.

Ujartuilluni aqutissiuussineq innersuussisarnerlu aqutigalugit atuartut arfinillit atualersussatut akuerineqarput. Atuartut atugarissaarlutik eqaatsumik nikerartumillu atuartitaasarpud aamma ullut tamaasa ilikkagaqarlutillu kajumissuseqartarput. Ataasiakkaatut nukittuffii ataqqineqarput taamaammat ataatsimuussutsimut nukittorsaataallutillu ataqqeqatigiinnermik pilersitsiviupput.

Atuartitsissutit ilinniartitsisut piginnaasaat soqutigisaallu malillugit agguataarneqarput. Imarisai periuserineqartorlu aallaqqaammud nalornissutigineqaraluartoq, suleqatigiit nutaaliorlutik ilikkagassatullu siunertat siunnerfilimmik anguniarlugit sulisimappud. Unammillernartitat sumiiffimmi aaqqiivigineqarput siunissamilu ingerlatsinissamut nalituunik misilittagaqalerfiullutik.

Atuartunik apersuineq

Ulloq 10. marsi 2025-mi atuartut arfinillit annertussutsimut tunngatillugu nalilersuinerui apersorneqarput. Atuartut oqariartuutaat malillugit ammasuusutut oqaaseqarluarnerunissamillu misigipput. Oqaatigaattaaq nikerartumik atuartitsisarneq holdilu inuttarpassuaqanngitsoq eqqissisimanartuullunilu malinnaaffigiuminartartoq. Ataqqeqatigiillutik tapersersoqatigiillutik ataatsimoorluartarlutik misigisimavaat. Atuartut arlallit inuttut suliatiqullu erseqqissumik ineriartuuteqarsimallutik oqaatigaat. Ingerlataq inuunerminni ilinniagaqarnermilu alloriarfittut pingaarutilittut isigineqarpoq.

Inerniliussaq

MA1-imi Paamiuni ingerlataq atuartunut atuartitsisunullu isumaqarluartumik ineriartorfiusumillu najoqqutassiisimavoq. Piareersaanerit suleqatigiinnerlu patajaatsumik toqqammaviliisimavoq. Atuartut malugineqartutut, tapersersorneqartutut aamma kajumissuseqartutut misigisimapput, aamma atuartitseriaaseq assigiinngissusermik inissaqartitsilluni ilikkariartornissamut avatangiisit toqqissisimanartuunissaannik peqataatitsinissaannillu tapertaasimallutik.

Ingerlataq suliniutitut piujuartitsisutut ineriartorfiulluartaussatullu inissisimavoq ilaatigut ineriartoqqinnissamut aamma atuartitsissutigineqartussani pigiliussinissamut periarfissagissaarluni.

Tasiilaq

Piareersarnej aallartisarnerlu

Nuummi 2023-mi aggustip qaammataani atualeqqaarnerup aallartisarnera iluatsittutut nalilerneqartup kingorna, kommunerisami illoqarfinni, tassa Paamiuni Tasiilamilu, atuutilersitsipallannissaq eqqartorneqarpoq. 2023-p naanerani paasitinneqarpugut, piareersarnej aallartisarnerlu ukioq nutaamiit pissasoq, taamaammat suleqatigiissitaq 2024-mi apriliip qaammataani piareersarnissaq pillugu Tasiilamiippoq, ilaatigullu illoqarfinni minnerni atualeqqaartussanut ataatsimut atugassanik suliaqartitsivugut, illup iluani atualeqqaarnissap aallartisarfiani ukkataqarfissatut ilanngunneqartussat eqqarsaatigalugit qanoq aaqqissuussisoqassasoq paasineqarniassammat illut titartagartaat pissarsiaraavut. Lectiop atorneqarnissaanut sivikitsumik pikkorissarnej ingerlanneqarpoq atulerniassagatsigulu atuisutut pilersitsilluta. Mappinik atuartunut, piareersarnermut il. il. atugassanik tunisippugut sakkussallu assigiinngitsut pillugit ilisarititsisoqarluni. Atuarfimmi illoqarfimmilu nukissat aallaavigalutigit atualeqqaarnissamut qanoq skiimaliortoqartartoq ilinniartinneqarpuguttaaq. Maajimi 2024-mi faglærerit katersuunnerannut peqataavugut, tassanilu Lectiop allarpassuillu atorneri itisilerlugit sammillutigit. Faglærerit katersuunneranniit utereernitsinni Majoriap illutaani piareersaatit aallartippavut. Pequtit nussorpavut, inniminnikkavut katersorpavut atualersussallu klassissai suliaralutigit. Innersuussisartoqatigiiliorpugut tassaniippullu Majoriap iluani illumi suliniutit tamakkerlutik taamaalilluta suliffeqarnermittaaq siammasissumik suleqatigiinneq ingerlatilerlutigu. Innersuussisartoqatigiit peqatigalugit gruppe qanoq ittoq ukkataqarfigissallutigu suliaqarpugut

kiisalu suut ujartussallutigit najoqqutassinneqariaratta ujartuilluta aqputissiuussineq ingerlatalutigu.

Aasaanerani annerusumik nunaqarfinni ujartuilluta aqputissiuussivugut, ilaatigut 2024-mi aggustimiit suliniutit suut ingerlatarineqassasut saqqummiullutigit, arlalinnit periarfissatsialattut isigineqarpoq soqutigineqarlunilu qinnuteqartoqarpoq. Arlallit oqaatigaat tassa amigaatigisimallugu siunissamilu ilinniagaqalerusulissagunik imaluunniit suliffeqarnermut appakaatissagunik annertuumik iluaqutaassasoq isumaqarfigalugu.

2024-mi aggustimi atualeqqaarnermi atuartut arfinillit aallartippat, taakkunani arlallit suliffeqarnermeersuupput ujartuilluni aqputissiuussinermeeerlutik.

Atualeqqaarnerup aallartisarnera assut iluatsippoq, atuartut ingerlatartik nuannaarutigaat ilimagingisaminnillu taamaattoqanngisaannarumaartoq alloriarnerujussuutut isigalugu. Peqataasunit tamanit arlalitsigut iluaqutigisimallugu takutippaat aamma ilinniagaqarniarnermik tamarmik ingerlataqarniartuupput, aamma avatangiisit sunnersimallugit ilaatigut ilinniagaqalernissamut imaluunniit ilaqutarisaat qinnuteqarnermikkut suliffittaarsimasut pillugit utertitsiffigitippugut. Atuartitsineq atuartitsisunut marlunnut agguataarneqarpoq, taakkulu paarlakaallutik atuartitsisarput, ingerlalluarpoq atuartitsisullu marluk akornanni ataaseq nutaaq suliap ingerlarnanut aallartilluarpoq atualeqqaartunilu atuartitsineq assut nuannarilersimallugu. Atuartitsisup nutaap atuartut kinaassusaasa assigiinngissutaat takusinnaallugillu atualeqqaarneriniit naammassinissaasa tungaanut qanoq siuariarsimatigisut takusinnaallugit. Atualeqqaartuni atuartitsisuunermi pitsaaquterpassuit ilagaat, atuartunut ataasiakkaanut qanorlu sukkassusaanut naleqqussakkamik atuartitsissummik nammineerlutik piareersarsinnaasaramik.

Atualeqqaartitsinermi klasseqalernera suliassaqarfimmut tamaat isigalugu assut pitsaavoq, qinnuteqarusuttut amerlapput arlallillu qinnuteqarlutik. Tasiilami pitsaaquterpassuutut pigisavut tassaapput, atuartuutitsinnut kollegianik inissaqartitsisinnaagatta taamaalillutalu nunaqarfinniit atuartuuteqarnissatsinnut periarfissaqarluta, taakkuuppullu ujartuilluta aqputissiuussinitsinni illoqarfimmut ilinniariarlutik unammillernartitatut isiginnittaraluartut atualeqqaartitsinitsinni neqeroorutitut naleqquttorpassuusartut.

Sisimiut

Sisimiuni atuutilersitsiniarneq sulí aallartisarneqanngilaq, ilaatigut naleqquttunik ininik pissarsinaveerneq pissutaalluni.

Sisimiuni Majoriaq illumut nutaamut nuutsinneqarpoq, tamannalu ataatsimut immikkoortortamik pilersitsiniarnermut ajornakusoortitsinialeraluarpoq – MA-mi suliniutit tamakkiisumik atuutilersinneqarnissaannut tunngavigisaq.

Illutaani init atorlugit ilikkariatortnermi avatangiisit ataqatigiilerseqqinneqarpata, pilersaarutaasup aallarteqqinneqarnissaa naatsorsuutigineqarpoq.

Qaqortoq

MA Qaqortumik sulí atuutilersinneqanngilaq.

Naammattumik ingerlatitseqqiiniarneq amigaataasimavoq aamma MA-1 pillugu Qasigiannguani misileraatitut suliniummiit Qaqortumut paasisanik nuussiniarneq (immikkoortoq 1) amigaataasimalluni, tamannalu aaqqissuussaannermik imaluunniit aallartisarnissamut perorsaanerup tungaatigut piareersimaneq pilersinneqannginnerinik kinguneqarluni.

Sulisut suliatigullu imarisat piareersaaviginissaat pisariaqarpoq taamaattumik aallartisarnissaq 2026-mut kinguartinneqarpoq.

Utaqqiisaa atuutilersitsinissamut patajaatsumik toqqammavissaqarnissamik qulakkeerinnittussaq ingerlatitseqqiinnermik ilinniartitsinermillu ingerlatassaq pilersaarusiorneqarpoq.

Uummannaq

Uummannami atuutilersitsiniarneq aallartisarneqareerpoq.

Atuarfimmi aqutsisoq Qasigiannguani immikkoortup 1-ip atuutilersinniarnenerani peqataavoq tamannalu tunngavigalugu 2025-mi aggustimi MA-p aallartisarnissaanut immikkut suliniummik aallartitsilluni.

Najukkami piginnittuuneq misileraatitullu suliniummit misilittakkat atorlugit siusissukkat ingerlalluartumillu aallartisarneq periarfissaasimavoq, illoqarfinnilu allani misilittakkatut atorluarsinnaasunik iluaqutaanissaa naatsorsuutigineqarluni.

Eqikkaaneq:

Suliniummi matumani qitiulluinnartutut pingaartitassat tassaapput sullitat pisariaqartitaasa ataavartumik qulaajartarnissaat kingornalu suliniut naleqqussarlugu, taamaalillutik neqeroorutit naleqquttuussapput, eqaatsuussapput iluaqutaallutillu.

Suliniutip ingerlannerani ajornartorsiutinik allanngorartunillu nutaanik takkuttoqallattaavoq taakkulu sullitat inuunerisa killiffiannik, ilikkariartornissamut toqqammavissamik tapersorsorneqarnissamillu pisariaqartitsinermik pingaarutilinnik paasisimasaqalersitsillutik.

Misilittakkat atorlugit ukkataqarfissanik nutaanik suussusersiniarneq periarfissaalerpoq ilaatigut politikkikkut oqaluuserinneqqinnissamut pilersaarusoqqinnissamullu ilaatinneqartussanik.

Suliniummiit angusat aalajangiinissamut politikkikkullu pingaarnersiuiinissamut atorneqassasut pingaartitarineqarpoq, taamaalilluni Majoriamik ineriartortitsineq periusissiaasumik siunissarlun gasinnerusoq eqqarsaatigalugu tapersorsorneqassalluni.

Suliassa qarfiit tulluuttuni unammillernartitat aalajangersimasut periarfissallu nutaat ilisaritinneqassapput, taakkuuppummi suliniutissamut periusissiaasumillu suliniutaasussanut toqqammaviliisussat.

Ingerlatitseqqiineq paasisanillu avitseqatigiinneq

Naalakkersuiso qarfiup, suleqatigiissitap aamma Majoriami najukkani atuarfiit akornanni MA-p anguniagaanik, aaqqissuussaananeramik toqqammaviusumillu naleqartitaannik aaqqissuussaasumik ingerlatitseqqiisarnerunissaq qitiusumik ukkataqarnermi pisariaqartinneqarpoq.

MA-mi siunertat atuutilersitsinermillu ingerlatsinerup paasineqartarneri assigiinngitsuusut misinnarpoq, taamaammatt atuuffiit, akisussaaffiit naatsorsuutigineqartullu qularutigineqalersarlutik.

Taamaattumik illoqarfiit akornanni ataavartumik avitseqatigiissutigineqartartussanik aalajangersimasunik attaveqatigiinnikkut ingerlatitseqqiisarnikkullu periutsit misilittakkallu pilersinneqassasut siunnersuutigineqarpoq.

Tamanna ataatsimut ilisarititsinermik, atuutilersitsinerup nutarterneqarneranik nalilersuinermillu nassataqarsinnaavoq.

Piareersimaneq aamma aaqqissuussaasup ineriartortinnera

MA-p atuutilersinneqarnissaanut piareersimanissap nukittorsarneqarnissaanut pisariaqartitsisoqartoq illoqarfinnit arlalinnit uparuarneqarpoq – aaqqissuussaannermi perorsaanermullu tunngasuni.

Iluatsittumik atuutilersitsinissamut tunngaviuvoq, MA-mi perorsaanikkut periutsit sullitalu ataatsimoorussamik sulisunit tamanit paasisimaneqarnissaat.

Taamaattumik illoqarfinni nutaami MA-mik aallartitsinissaq sioqqullugu, ataatsimoorussamik aallaaveqarnissamik qulakkeerinnittussaq piginnaangorsaanermik ilisarititsinermillu sulisunut ingerlatsisoqarnissaa suliarineqassaaq.

Tamanna pitsaassutimik annertusaassaaq, sulinermi ataqatigiissitsinerulissaaq aamma sulisut suliap ingerlanneqarneranik piginnittuunerinut kajumissuseqarnerinullu ikorfartuutaassalluni.

Nukissat inissaqassuserlu

Atuutilersitsinermi nukissanik sulisoqarnermillu inissaqassutimik amigaateqarneq unamminangaatsiarsimavoq – pingaartumik illoqarfinni mikinerusuni.

Najukkani pissutsit assigiinngitsuunerat pissutaalluni eqaatsumik aaqqiisariaqarnermik kinguneqartarpoq, ilaatigut sulisut arlalinnik atuuffeqartarlutik. Taamaattumik illoqarfinni ataasiakkaani sulisunik, ininik atortussanillu pisariaqartitanik suussusersisussamik nukissanut inissaqassutimullu pilersarusiortoqartariaqarpoq.

Tamanna illoqarfinni piujuartitsisumik MA-mik ingerlatsinissamut piviusorsiortumik toqqammaveqarniassammata atuutilersitsinissamut suliaqarnermi pingaarnersiuiinissamut, pilersarusiornissamut tapersersorneqarnissamullu toqqammaviliissaaq.

Nalilersuineq aamma pitsaassutimik qulakkeerineq

MA-mik suliaqarnermi pitsaassutsip attatiinnarnissaanut ineriartorteqqinnissaanullu, assigiissakkamik nalilersueriaatsimik pisariaqartitsisoqarpoq.

Illoqarfinniit misilittakkat takutippaat, aaqqissuussaasumik malitseqartitsineq ataatsimoorussamillu atortussat akimortumik ilikkariartornermut ineriartornermullu nukittorsaataasut. Taamaattumik

Majoriani tamani atorneqarsinnaasumik nalilersuinermit sakkussanik ataatsimoorussanik suliaqartoqassasoq siunnersuutigineqarpoq.

Sakkussaq pitsaassutsimut annertussutsimullu periutsinut tunngasunik imaqartinneqassaaq aamma ataavartumik ilikkariartornermik, naleqqussaannermik uppersaasarsuisarnermillu toqqammaviliissalluni.

Init avatangiisillu ilikkarnartut

Illoqarfinni arlalinni MA-mik ataatsimut avatangiisinik pilersitsinissamut ajornakusoortitsisumik ininik amigaateqarnermik imaluunniit naammanngitsunik ajornartorsiuteqarsimapput.

Taamaattumik ilinniarfeqarfiit illutaasa ilusilersorneri, matumani sannaveqarnissamik, nutaaliornissamik aamma eqaatsumik aaqqiissuteqarfiusunik atuagarsornermut assassornernullu suliaqarfiusunik inissaqartitsisunik ukkataqartoqassasoq innersuussutigineqarpoq. Siunissami suliniutaasussaq tassaasinnaavoq, Majoriani atuarfiit ataatsimoorussamik pitsaassutsimut toqqammaveqarniassammata inillu immikkuullarissusaat attanneqarlutik, qanoq aaqqiissuunneqartarnissaannut atortorissaarutaannullu malittarisassaliortoqarnissaa.

Atuartitsinermi atortut

Majoriami digitalikkut atuartitsinermi sakkussatut maannakkut atorneqartut suliarineqarput aamma siunissami digitalimik ilinniartitsisarnermi sakkussat suut ineriartorteqqinneqassat atulersinneqassasullu naliliiffiginissaannut toqqammaviliisinnaapput.

Naak suliniutip kingunerisaanik atuartitsinermi atortorpassuarnik suliaqartoqaraluartoq, atuartitsinermi toqqaannartumik atorneqarsinnaasunik atortussanik aaqqiissuusaanerusunik pisariaqartitsisoqartoq paasivarput.

Taamaattumik atortussat qanoq katersorneqassasut suliassartalinnullu atuaganngorlugit aaqqiissuunneqassasut suleqatigiissitamit siunnersuusiortoqarpoq.

Sakkussaq suliatigut ingerlatsinermi aamma piginnaanngorfaatitsinermi atorneqarsinnaasoq pilersinneqassasoq siunertaavoq, taamaalillutik atortussat tigussaanerulissapput, assigiinnerulissapput taavalu atuartitsisunut atuartunullu assassornikkut atoruminarnerulerlutik,

aamma atuartitsinermi digitalimik sungiusarneq sakkussallu ilaatinneqarnissaannik siunnersuuteqartoqarluni.

Innersuussutit:

Aningaasarsiorinissamut imminullu pilersornissamut periarfissaqalerneq

Majoriami atuartut nutaalianik, suliniutit nutaaliarluni pinngortitameersunillu sulianik ilinniarnermi piginnaanngorsarnermilu ingerlataminnit aningaasarsiorfiginissaannut periarfissiisunik najoqqutassanik pilersitsisoqarnissaa pisariaqartinneqarpoq.

Suliat tamakkua imminut pilersorneruleriartuaarnissamut aqqutissaasinnaapput, pingaartumik innuttaasunut assassornermut najukkamilu pigiliussanik isertitaqarnissamik periarfissanik pisariaqartitsisunut.

Ullumikkut periarfissat taakkua pisortani immikkoortumi malittarisassat atuuttut kiisalu unammillernissamut inatsit naapertorlugu killilersugaapput ilaatigut kalaallit atugaannut naleqqussagaanatik.

Najukkani innuttaasut amerlaneq ajortut, sumiiffiit imminnut ungasissorujussuusut killilimmillu sulisussaqartarneq ima kinguneqarpoq, najukkami nutaaliornermut annikitsukkuutaanillu aningaasarsiornermut ikorfartuutaasunik Kalaallit Nunaat eqaannerusumik najoqqutassaqarnissamik pisariaqartitsivoq.

Taamaattumik periarfissanik Majoriami atuartut isertitaqalernissaanik suliaqartoqartariaqarpoq makku atornerisigut: nutaaliornermi najoqqutissat (assassorneq, eqqumiitsuliorneq, ilusilersuineq), pinngortitamut attuumassuteqartunik suliaqarneq, soorlu paarnanik, naasunik, pupinnik najukkamilu pinngortitamit atortussanik katersineq suliaqarnerlu, pinialunneq aalisarneq, ass. misileraatitaalluni angalaneq, piniarnermik suliaqarneq imaluunniit najukkami aalisartunik suleqateqarneq, takornarialerineq, ass. angallassinerit, kulturilerineq, pinngortitamut pisuttuarnerit, workshoppit mikinerit imaluunniit takornarianut nioqqutissanik tunisineq, mikisunik nioqqutissiorneq ilaatigut najukkami suliaqarsinnaasut mikisunik suliaqarlutillu tuniniaasinnaallutik

Periarfissanik tamakkuninnga ammaassinikkut Majoriaq najukkani mikisunik aningaasarsioritseqataasinnaavoq, ilaatigut innuttaasunut assassorluni piginnaasaminnik atuineratigut isertitaqalernermikkullu periarfissiisunik.

Tamatuma peqataanik najukkami piujuartitsineq, kulturikkut kingornussat kalaallillu kinaassusaat nukittorsarneqassapput aamma sulinermi inuiaqatigiinnilu inooqataanermi peqataanissamut nutaanik aqqutissiuusseqataassalluni.

Eqaannerusunik najoqqutaqarnikkut Majoriaq taamaalilluni siunissami imminut pilersorfiunerusoq, nutaaliordiunerusoq pinngortitamilu pisuussutsinik atorluaanerusoq innuttaasut inuunerannik allannguajaatsumik isumaqarluartumillu pilersitsiviginissaannut qitiusumik inissisimasoq iluaqusiissaaq.

Suliniutip isumaqassusaa politikkerinillu eqqumaffigineqarnissanut pisariaqartitsineq

Suliniut Majoriami pitsanngorsaangaatsialereerpoq, tassa suliatigut, aqqissuussaanikkut perorsaanerullu tungaatigut.

Taamatut alloriartoqarnera pissutaalluni Majoriami aqqissuussatut atorneqarsimasumut uteqqinnissaq periarfissaajunnaareerpoq imaluunniit kissaataajunnaareerpoq.

Misilittakkat nutaat erseqqissumik takutippaat, Majoriap allanngoriartornerani suliniutitut angusat attatiinnarneqassappata ineriartorteqqinneqassappatalu sulit politikikkut eqqumaffigineqarlunilu tapersorsorneqartariaqartoq.

Tamatuma peqataanik qitiusutut suliniuteqarpoq arlalinnik politikikkut aalajangiiffigineqanngikkunik, sulisussaqaanngikkunik najoqqutassatulluunniit atukkani allannguutitaqaanngikkunik ingerlariaqqissinnaanngitsunik. Matumani ilaatigut makku pineqarput:

- Misileeriaatsit nutaat sullitat pisariaqartitaannut ilikkariartornissaannullu tunngavigisaannut naapertuuttut
- Peqataanermi uppersaatsit akuerisaasut ilinniagaqarnermi suliffeqarnermilu atorneqarsinnaasut
- Najukkami ilikkagassatut anguniakkat kulturimut, inooriaatsimut nunallu immikkoortuini pissutsinut naleqqussakkat
- Najukkami suliniutinut isertitassatut periarfissat, matumani nutaaliorderit, pinngortitameersut takornarialerinermilu suliassat ilanngullugit

- Innuttaasut piginnaasaannik ataavartumik qulaajaaneq, najukkami suliffeqarnernut naleqqussakkat
- Illoqarfinni tamani pisariaqartitat sukumiisut tunngavigalugit pikkorissaanerit piginnaasaqalersitsisussatut ineriartortinneqartussat

Suliassaqarfiit tamakkua Majoriap siunnerfigisaanut imminut pilersornissamut, najukkami ineriartortitsinissamut piujuartitsisumillu suliffeqarnernut iluaqutaanerusussanik pingaarutilittut alloriarnertut paasineqassapput.

Siuariartornissaq qulakkeerniarlugu nunalu tamakkerlugu Majoriap piffissami sivisuumi atasinnaasumik najoqqutassaqaalernissaa anguniarlugu suliniummi angusat innersuussutillu politikerit aalajangiiniarnerinut ilaatinneqassasut pisariaqarpoq.

Majoriami inunnik isumalluuteqarneq pillugu ajornartorsiummut aaqqiissut

Illoqarfippaalunni unammillernartinneqangaatsiartartoq tassaavoq inunnik isumalluuteqarnerujussuaq, ilaatigut Majoriami atuuffiit sammisassallu sulisut ataasiakkaat tunniusimasarnerannik piginnaasaannilluunniit isumalluuteqarfiusartut.

Neqeroorutitut tamanna ajalusoortitsisinnaavoq aamma pitsaassutsimut, ataavartuunermut ineriartornermullu kigaallisaataasinnaalluni.

Ajornartorsiutaasoq aaqqiiviginiarlugu illoqarfinni tamani najukkami nukissanik aaqqissuussaanagerusumik qulaajaasoqarnissaaq pisariaqartitsisoqartoq erseqqissaatigineqarpoq.

Najukkami nukittuffiit, periarfissat piginnaasallu suussusersineqariarpata, suliniutit atuartitsinermillu ingerlatassat inerisaaviginissaat periarfissaalissaaq: sumiiffimmi ineriartornissamut periarfissanut naleqqussaasinnaasut, illoqarfiup inissaqassusaanik kulturikkullu immikkuullarequtaanik tunngaveqartoq, sulisunik taarseraattoqartigigaluarpat ingerlateqqinneqarsinnaasoq, allanngujaannerullunilu piujuarnerusoq

Suliniuummi inerniliineq naapertorlugu najukkami nukissat, ileqqorisat kulturikkullu naleqartitat aallaavigisarneri aalajangiisuusarput.

Immikkoortutut pineqartut siunissami suliniutitut pingaarutilittut ingerlatsiuartuusinnaapput, tassami kinaassutsimik, kajumissuseqarnermik najukkamilu pigiliussisimanermik iluaqutsisaramik.

Najukkani nukissat naapertorlugit suliaqarnermi Majoriaq patajaatsunik, inunnik isumalluuteqarpallaannginnerusunik illoqarfiillu ataasiakkaat atugaannut naleqqussarsimanerujussuarnik tunngaveqarluni aaqqiissutissanik pilersitsisinnaavoq — taamaalillunilu piujuartitsinerusumik aamma najukkami ineriartortitamik nuna tamakkerlugu ingerlatsisinnaalluni.

Periutsip inummut naleqqussarnera – illuatungaanuunngitsoq

Allaaserineqareersutut inuit nappaataat aallaavigalugit imaluunniit sullitaanerat aallaavigalugit immikkoortiterneqarnissaat pisariaqartinneqarsinnaavoq, pingaaruteqarporlu erseqqissaatigissallugu immikkoortiterineq taama ittoq kinaassutsimik annaasaqarnermik, pitsaanngitsumik isiginnilersitsineq avataaniittutullu misigineq kingunerisinnaavai.

Inuit "ajoqutaasutut" misigisimatillugit imaluunniit allatut ileqqoqartutut misigisimatillugit ineriartornissamut, ilikkagaqarnissamut inuiaqatigiillu akornanniinnissaannut inuunerup sinnera tamaat aporfeqartitsinermik kinguneqarsinnaavoq.

Taamaattumik suliniummi matumani qitiusumik tunngaveqartitsivugut, tassa periuseq inummut naleqqussarneqassasoq – inuk periutsimut naleqqussarneqassanngilaq.

Inuit nukissatik, periarfissatik inuunerminnilu oqaluttuassartatik aallaavigalugit Majoriaq naapittarfigissavaat – killeqarnerit amigaatilluunniit tunngavigineqaratik.

Ilikkagassatut anguniakkanut nutaanut Majoriamilu periutsinut nutaanut suliniummi siunnersuuteqarnikkut tamanna tapersorsorneqassaaq.

Makkuninnga pilersitseqataassapput: inissaqartitsinerulerneq, ilinniarfigisami peqataatinnerulerneq, eqaannerunermik periuseqarneq aamma atuartitsinermi nikerartuunerneq, ilinniariaatsinik, ilinniarnermi sukkassutsinik aallaavigisanillu assigiinngitsunik inissaqartitsinerneq

Taamaaliortoqarneratigut Majoriaq suliffeqarfittut inunnik najoqqutassanut naleqqussagassatut periuseqarfiunngitsutut suliffeqarfiusinnaavoq, kisiannili ilinniarnermi avatangiisit ataasiakkaanut tulluussarlugit ilusilersorneqarlutik - inuup inooqataanikkut, kulturikkut ataasiakkaatullu tunngaveqarneratigut ataqinnittumik isiginnittaaseqarluni.

Maannakkut suliniutigisanik suussusersineq periutsimillu pitsaaliuinerusumik pisariaqartitsineq

Allaaserineqareersutut ilinniartitaanermut, isumaginninnermut peqqinnissamullu immikkoortut akimorlugit maannakkut ukkataqarfiusut suliniutaasullu pioreersut suussusersineqarnissaat pingaaruteqarpoq — timikkut tarnikkullu.

Ullumikkut pisortani suliniuterpasuit ima aaqqissugaapput, inuunermi pitsaassuseq sanngiillisitaasutut imaluunniit innuttaasoq atugarliortutut timikkullu piginnaasatigut annaasaqartutut misigippat periutsit malillugit aatsaat iliuuseqarfigineqartarput.

Taamatut periuseqarnermi amerlasuutigut ajornartorsiutit qisuariarfigineqarnerinik paasisassaapput pitsaaliuineq pinnagu.

Avatangiisit inuit atugarissaarnerinut, inuuneranni pitsaassusaannut ulluinnarnilu naleqartitsisartunut iluaqutaasut pinnagit, periusissaq naapertorlugu annaasaqarnissamik taartissaq immaqa pitsaaliuinerusinnaasoq atorneqarsinnaavoq.

Taamaattumik suliniuteqarnikkut iliuutsit pitsaaliuinerusut, ataqatigiinnerusut ataatsimullu isiginnittut suussusersinissaat pisariaqartinneqarpoq makku aallaavigalugit: najukkami kulturikkut avatangiisit, pinngortitaq ulluinnarnilu avatangiisit, innuttaasup nammineq naleqartitai inuuneranilu oqaluttuassartaa, ataatsimoortut inuunerullu sinnerani attaveqaatit

Immikkoortut tamakkua Majoriamut siunissami takorluukkani atatitsisuusinnaapput, ilaatigut ukkatarisaq "iluarsaassinermiit" siusissukkut iliuuseqartarnermut, inuunermi pitsaassutsimut inuullu ineriartorneranut sammitinneqarnerusinnaalluni.

Najoqqutassat tamakkua naapertorlugit sulinikkut Kalaallit Nunaat tamakkerlugu atugarissaarnermik nukittorsaasumik, inooqataanikkut pingaanngitsutut inissisimasunik pitsaaliuisumik aamma ataatsimoortunik tatituunik isumaqarluartunillu pilersitsisunik ilinniarnermik inuunermillu ingerlataqarneq isumaqarluartoq angussallugu Majoriamit peqataaffigineqarsinnaavoq.

Ajornartorsiutit siunnersuutitalinnik ilallit

Allaaserineqareersutut suliniuteqarnikkut sullitat pisariaqartitaasa ataavartumik qulaajarneqartarnissaat Majoriamullu kingorna naleqqussartarnissaat pingaartitarineqarpoq: ajornartorsiutit tullinnguuttuniittut sammisanut agguataagaapput periutsinik sakkussanillu aaqqiissutissatut siunnersuuteqarfiusut: Sammisami periutsit sakkussallu sulinermi periutsit immersugassallu suliarineqareersut aalajangersimasut takuneqarsinnaapput. Taakkua katersuunneqarput ilanngussanilu takuneqarsinnaallutik.

Takussutissani qulequttat qorsunnik nalunaaqutsikkat suliniuteqarfiup ingerlanerani ajornartorsiutinik ineriartorfissatullu pisariaqartitanik nutaanik takutitsisuupput. Suliassa qarfiit taakkua sulii tamakkiisumik suliarineqanngillat, kisiannili Majoriap nangittumik ineriartorneranut pingaaruteqartutut nalilerneqarlutik taamaattumillu 2026-mi suleriaqqinnermi ingerlateqqinneqassallutik.

Sammisani immikkoortut qorsuit isumaqarput qulaajaanerunissamik, periutsinik ineriartortitsinissamik, inissaqassuseqarnerulernissamik imaluunniit politikkikkut isummerfiginissaannik pisariaqartitsisoqartoq.

Suliassa qarfinnik taakkunannga suliaqarnermi suliniummi immikkoortunngortussap ilaattut isigineqassaaq, ilaatigut aqutisooqatigiit suleqatigiissitarlu suliniutinik piukkunnarsaaqataassallutik nunalu tamakkerlugu piujuartitsisumik atuutilersitsinermik qulakkeerinneqataassallutik.

Qulequttat taakkua nutaat taamaalillutik sullitat pisariaqartitaanik, najukkami pissutsinik aamma ilinniartitaaneq suliffeqarnerlu pillugit politikkikkut anguniakkat Majoriap ataavartumik naleqqussaasinnaaneranik nukittorsaatitsisussaq ataatsimut ineriartortitsiffiusussatut pineqarpoq: